

# Smještaj Policijske stanice „Istok“ u fokusu Vlade TK i resornog ministarstva u narednoj godini

11.12.2019 15:07

„Vlada Tuzlanskog kantona pronašla je rješenje za adekvatan smještaj Policijske stanice „Istok“ u Tuzli, i rješavanje ovog pitanja bit će u fokusu djelovanja Vlade i resornog ministarstva u 2020. godini“, kazali su danas premijer Tuzlanskog kantona Denijal Tulumović i ministar unutrašnjih poslova Sulejman Brkić.

Neadekvatan smještaj i neuslovnost objekta u kojem je trenutno smještena Policijska stanica „Istok“ u Tuzli, problem je s kojim se već dugi niz godina suočavaju, kako službenici policije, tako i građani koji se za rješavanje svojih problema obraćaju službenicima ove stanice. Činjenica da rade u objektu koji nema adekvatne uslove niti opremljenost za obavljanje specifičnih poslova policije, u mnogome je bila ograničavajući faktor za postizanje kvalitetnijih rezultata.



S tim u vezi premijer Tulumović i ministar Brkić su danas u društvu sa svojim saradnicima posjetili prostorije trenutne Policijske stanice „Istok“, ali i objekta u krugu Kampusu Univerziteta u Tuzli, koji već koristi Jedinica za podršku, a koji bi nakon rekonstrukcije i adaptacije bio idealan za smještaj PS Istok.

„Očekujem da bi smo uz podršku Skupštine Tuzlanskog kantona mogli već do trećeg kvartala slijedeće godine završiti sve potrebne poslove i stvoriti preduslove za „preseljenje“ PS Istok u znatno kvalitetniji prostor, koji bi mogao odgovoriti svim profesionalnim potrebama jedne policijske stanice. Time ćemo stvoriti uslove da službenici policije ostvare još bolje rezultate u oblastima kojima se bave, ali i da građani mnogo lakše i ugodnije ostvare svoje potrebe“, rekao je tokom obilaska budućeg objekta PS Istok ministar unutrašnjih poslova Sulejman Brkić.

Informacija i fotografije Odjeljenja za informisanje Vlade TK-a

---

*Preuzeto sa web stranice* **Ministarstva unutrašnjih poslova Tuzlanskog kantona** - <https://muptk.ba>